

Sport

Johann Leupold

Jeden Maandag un meist ok noch an'n Freedag is de Zeitung vull mit Sportnarichten. Meist is dat ja Football. Aver mal 'ne Tiet stunn Tennis ganz baben. Du warrst ja woll noch weten, keen Boris un Steffie weern! Dormals stunn dat halve Blatt full mit Narichten över de beiden. Un denn keem Michael Schumacher un jaagt mit sien lütten Flitzer allet in Grund un Bodden, un de Fahnenfabriken müssen Sonderschichten inleggen, dormit se all de roden Fahnen produzeern kunnen, de de Lüüd köpen wullen. Un denn weern de Radfohrers dran – so lang, bit dat se rutfunnen, dat de ehr Können oftins man blot künstlich is.

Sport is heel wichtig – dat seggt ok de Dokter. Aver he meent darmit nich den „Fernseh-Sport“. För de meisten is Sport blot dat, wat se in't Kiekschapp ankieken künnt. Se köfft sik 'n bunten Antog un Schauh mit dree Streepen up, hangt sik ehren Fan-Schal um, haalt sik 'n Kiste Beier, un denn fangt de Sport för se an.

Mit Feernsehsport kannst du den ganzen Dag tobringen. Dat giff ja nich blot Football un Tennis un Radfohren. Nee, dat giff för Jeden sienen Spezialsport, un du kannst so veel Wettbewerbe finnen, dat woll ok de Slappste den Weg up jichtenseen Siegertreppchen finnen kann: Du kannst 'ne körte Streck lopen oder 'ne lange oder 'ne mittlere oder över lütte Tuuns bi'n Hürdenloop, oder dör dat Gelände. Un du kannst di mit annere afwesseln bi den Staffel-Loop.

Up dat Water kannst du in'n Einer sitten oder in'n Zweier oder in'n Vierer oder in'n Achter, un du kannst dat mit Stüermann doon un ahn Stüermann. Un du kannst in grote Boote över dat Water föhren oder in lütte un up glattet Water un up „Wildwater“. Un bi Olympia giff dat acht Seilboots-Klassen un ik bin seker, dat dat dor ok för mi een geben deit un dat ik as Water-Alleriker vielleicht ok 'ne Medaille kreegen kün, wenn ik blot de richtige Wettbewerb rutfinn.

In de letzte Tiet is ja de Marathon-Loop wedder modern worrn. Da muttst du 42 Kilometers lopen ahn antohollen. Wieldat för mennigeen to veel is, giff dat ok den „Halb-Marathon“. Dat is mal 'ne feine Saak, un in düsse Richt heff ik wiederdacht: Vielleicht giff dat ja denn ok den Veertel-Marathon oder den Teihntel-Marathon un so wieder. För mi weer't aver woll an'n Besten, wenn ik den – seggt wi mal: „Prozent-Marathon“ lopen dä. Dat weer denn man blot üm de Eck, un ik bruk achterna nich to jappen un ok nich ünner de Duusch. Un ik kann mi up den Rückweg ok glieks 'n buddel Beier mibringen.

An'n besten find ik ja den Kombi-Sport. Da kannst du di as Sportarten-Erfinder so richtig an utlaten. Du kannst Riden un Swömmen un Scheeten in een Wettbewerb doon. Oder du kannst Radfohrn un Swömmen un Lopen oder Lopen un Fechten un weit de Henker wat noch allet. Un dat kannst du ok noch up Skiern in'n Winter doon. Un jedetmal kannst du damit reken, dat du diene Halle oder dien Stadion oder diene Arena, as dat nu heeten deit, vullkriigst.

Mien Vörslag weer denn: Maakt doch maal ne „Veer-Arenen-Tournee“ mit fief mal föftig Meters swömmen (afwesselnd Jungs un Deerns), Kajak-Staffel un vielleicht noch Boxen dato. Dat müss interessant sien!

Wieldat de Sportlers, de up dat Treppchen steiht, von de Sponsors so veel Geld kreegen doot, willt se all dor rup. Un wenn dat nich mit reelle Middel geiht, denn söcht se sik 'n anneren Weg, un se fangt dat Dopen an. Un de pffiffigste Doper kriggt den Pries un dat Geld von den Sponsor. Un de reellen Sportlers sind bescheten un de Tokekens ok, un eegentlich sünd se doch sülmst schuld.

Nülich heff ik en drapen, de is in sien junge John Ringer ween. He vertell mi, dat he as Söbenteihnjährigen sien „Fliegengewicht“ hollen mösst hat. Un dafür het he vör jeden Kampf lange in de Sauna sweeten mösst. „Wicht rünner!“ weer dat Ziel. Un so het he lange Stünn sweet. Un darna het he up de Waag mösst. „Ünner föftig! OK!“ sä de Trainer. Aver den Döst von den armen Jungen kannst di woll denken. Un den het he bi'n Duschen löscht – he hett dat Duschwater drunken – un denn weern de föftig Kilo wedder flöten un he het wedder in de Sauna sweeten mösst. Doping is dat ja nu nich, aver ist sowat Sport?